

08 JAN 1999

Abdullah-janji

ABDULLAH JANJI LAKSANAKAN TUGASNYA DENGAN PENUH DEDIKASI

KUALA LUMPUR, 8 Jan (Bernama) -- Datuk Seri Abdullah Ahmad Badawi yang hari ini dilantik sebagai Timbalan Perdana Menteri yang baru, berjanji untuk melaksanakan tugasnya dengan "sebaik-baiknya dan penuh dedikasi."

Sambil mengucapkan "setinggi-tinggi terima kasih" kepada Perdana Menteri Datuk Seri Dr Mahathir Mohamad, Abdullah berkata beliau merasa terharu dan terkejut dengan pelantikan itu.

Dr Mahathir yang mengumumkan pelantikan itu selepas mempengerusikan mesyuarat Majlis Tetinggi (MT) Umno di sini hari ini, turut melantik Abdullah sebagai Menteri Dalam Negeri.

Jawatan Abdullah sebagai Menteri Luar akan diambil alih oleh Datuk Seri Syed Hamid Albar.

Bercakap kepada pemberita di sini, Abdullah berkata: "Saya rasa terkejut juga oleh kerana rakan-rakan saya yang lain yang dipertimbangkan oleh Perdana Menteri adalah juga mereka yang berkemampuan."

Abdullah berkata beliau memerlukan pimpinan Dr Mahathir dalam menjalankan tugas dan tanggungjawabnya yang baru itu.

"Saya terus mengharapkan pimpinan daripada Perdana Menteri yang begitu berpengalaman dalam hal pentadbiran," kata beliau.

Abdullah, seorang Naib Presiden Umno, berkata beliau juga mengharapkan akan mendapatkan kerjasama daripada rakan-rakan beliau dalam kabinet.

-- BERNAMA

TM MAI